


DE IGNITABVLO –

res gestae patris Caelestis et Sigrídis in Batavia

Ut plerisque locis fit, in Batavis quoque studiorum Universitatis litteris classicis non nisi theoretice - i.e. legendo tantum studetur. Insuper, ex compluribus annis condiciones universitariae non omnibus ex partibus litteris humanioribus favent. Quibus infortuniis alii aliter iam mederi conati sunt. Igne novo opus esse videbatur et haec fuit causa cur Adrianus J. Kleywegt, professor academicus linguae et litterarum Latinarum in studiorum Universitate Libera Amstelodamensi (Vrije Universiteit) decrevit sibi ignitabulum quaerendum esse ut nova scintilla subiceretur studiis semi-exstinctis. Ignitabulum igitur patrem Caelestem invitavit, ut materiam studentium nostrorum incenderet. Qui re vera una cum doctrice Sigríde die 14^o m. Febr. Amstelodamum vel potius Amstelovenum advectus est, ubi post longiores circuitūs (propter descriptionem itineris non satis accuratam, quippe quae ab auctrice huius relationis praebita esset) hospites Amstelodamenses convenit. In deversorio Italiano cenam sumpsimus inter colloquia hilaria eademque Latina, ut puer qui cibos ministrabat admiratione captus esset, quod primum omnium Latine loquentes audiret.

Postridie omnibus participibus in oeco quodam aedium Universitatis Liberae congregatis, plerisque ex Universitate Liberā, non nullis ex Universitate Noviomagensi oriundis, institutio incohata est. Paucis horis post omnes fere prima verba Latina ediderant et universi nunc credebant saltem re vera fieri posse ut homo satīs modernus de qualibet re linguā non ita antiquā usus disputaret.

Postmeridiano tempore iter investigatorium medianam per urbem Amstelodamum facturi eramus. Quod reapse nobis contigit postquam difficultates aedium relinquendarum superavimus. Electricitas enim ita disturbata erat ut anábāthra officiis suis vix iam fungerentur (et nos in tabulato undecimo eramus!) et horologia alia alias horas indicarent. Foris autem tempestas nobis tam valde arrisit, ut ambulationem periucundam faceremus. In itinere mandata



Institutio «Latinitatis vivae» in studiorum universitate Amstelodamensi Libera die 15^o m. Feb. a. 1988^o, die lunae, facta.
[Photographēma D. sic Sigrídis Albert(oo)]

nonnulla nobis exsequenda erant a Mennone et Marco excogitata. Itaque accidit ut paene fures fieremus cum chartulā complicatā deversorii cuiusdam necnon suppositulo (i.e. chartulā rotundā vel quadratā in quā cervesiā apponi soleat) nobis potiendum esset. Horā 17^a omnes in Universitatem reversi dialogum de amphitheatro et de cīnēmatographéō audivimus quo multa verba nova addisceremus.

Vespere apud Carolinam Fisser eramus ubi Remus diserte locutus est de vita et itineribus Sancti Pauli. Sed minus placuit quod, eheu, subito et ex improviso me rogavit ut locă nonnullă in chartā geōgraphicā quādam indicarem. Topographia est res difficillima, Reme! Sed feliciter accidit, quod paulo post apparuit me nimis brevi staturā esse, quam ut loca altiora in chartā indice tangere possem. Tum professor noster insuperabilis benigne hōc munere me liberavit. Postea Margarita mecum versionem Latinam fabulae musicae de Petro et lupo ab Russo Sergei Prokoviev(o) modis musicis instructae narravit. Insuper praemia eximia Rolando et Rogero, victoribus certaminis quod pars itineris investigatorii erat, data sunt a Mennone et Marco qui ambulationem praeparaverant. Cum autem unā cum Margaritā domum reverti vellem, bīrota mea prorsus inutilis esse apparuit, quia nullus aēr in cantho relictus erat. Pedibus igitur Amstelovēnum revertimus. Postea compéri ipsam quoque birotam evanuisse. Cavete fures birotarum si umquam Amstelodamum veneritis!

Die Martis varios modos salutandi exercuimus. Iohanna, quae rem satis perspectam nondum habebat, ad salutationem humanam patris Caelestis («Salva sis, Iohanna!») breviter quidem, sed ex toto corde respondit: «Hoi!» Deinde multis cum participibus colloquia instituit pater Caelestis, interdum satis ridicula. «Quando Latine cogitare incipes, Ludovice?» - «Non cogito!». Et quid de Iohanne nostro? Qui interrogatus num ad lacunar ascendere vellet, respondit: «Volo, sed non possum». Quare non potes? «Quia humanus sum». Suntne illi qui ascendunt non humani? «Aut non humani aut Lionel Ritchie!» Dialogus satis complicatus insecutus est cum Iohannes explicare conaretur Lionel(um) Ritchie cantatorem popularem esse qui in pelliculis quibusdam cinematographicis ad lacunar ascendere videretur. Postea Sigrīdēs et pater Caelestis apólögum Grimmianum de Iohanne prudenti dramatice proposuerunt.

Postmeridianum tempus variis ludis dedicatum erat quorum studentes nostri versiones Latinas fecerant. Scriptulis («Scrabble») igitur, tortulā («Twister»), Mnemósyne («Memory»), quadrigīs («Quartett») lusimus. Insuper ludus Odysseae, ab Empedocle (Emgert Zondervan) excogitatus primum omnium in usum introductus est. Praeterea fuit ludus «Quim Quam Quet» (linguā Batāvā: «Pim Pam Pet»), in quo lusores nomina rerum certarum dare debent quae ab litterā sorte decretā incipient.

Vespertino tempore pater Caelestis et Sigrides invitati erant ab Elselina Vester, doctrice linguae Latinae, quae cenam optimam praeparaverat. Aderant insuper nonnulli docentes et professores linguarum et litterarum classicarum, alii satis sceptici de usu Latinitatis Vivae, alii iam aliquatenus talis rei fautores. Studentes interea apud Mennonem convenerunt, ubi «Nederlandse Borrel» praebebatur (i.e. Symposium Batavum, ubi potulenta varia praebentur et insuper caseus et farcimenta parvis vexillis Batavis exornata), videlicet ut aequilibrium inter res Latinas et res Batavas conservaretur.

Nihilominus omnes die Mercurii satis vigilantes et alacres horā nonā aderant. Hōc ultimo die tridui nostri exercendi causā telephonemata inter nos habuimus de argumentis diversissimis. Aliā de praesentiā innumerabilium cuniculorum questā est, et opem

professoris et canum venatoriorum petivit, aliaā invitationem ad diem natalem amici celebrandum accepit. Alii de amore infelici loquebantur, alii in qualitatem deversorii Sīnīcī - ubi vesperē cenaturi eramus - inquisiverunt, sed - quod maximi momenti erat - omnes nullo excepto verba quamvis pauca Latine protulerunt.

Veridie variis locis dispersi participes se ad res vesperē agendas praeparaverunt neque prius inter nos revidimus quam inter cenanam communem in deversorio quod «New San Kong» vocatur.

Post hanc cenanam celebratio valedictoria facta est in aedibus quibus Moria nomen, eademque hilarissima. Tot carmina, comoediunculae, fabellae rarissime uno vesperē exhibita sunt, opinor. Omnes paucissimis horis aliquid excogitaverant, quod Latine proponerent. Hospites Noviomagenses carmen quod inscribebatur «Laus tridui Latini» cecinerunt. Tirones nostri, studentes primi anni, fabellam ab Adriano conscriptam in scaena egerunt et deinde dialogum ab auctore Graeco Luciano factum nobis recitaverunt, cuius versio Latina a Marco facta erat. Nomine omnium Menno gratias agens patri Caelesti et Sigridi dona Batava eis dedit. Communis quoque cantus institutus est et complura cantica concatenata quae dicuntur, cecinimus.

Cum programma finitum esset, omnibus paulisper inter se colloquenter Iohannes clāvīlī cecinit. Denique omnes domum revertimus, postquam pater Caelestis et Sigrides omnibus valedixerunt.

Sed etiam nunc in Studiorum Universitate Libera si bene auscultas, interdum pauca sed

distincta verba Latina audiiri possunt et fortasse idem valet in Universitate Noviomagensi.

Hic est effectus ignitabuli.

Materia iam fervet.

Mox incendium fiet.



Rogerius(?) - Prof. Dr Adrianus in
(17.2.1988) scaena constitutus ut
lupus in fabula.
[Photographēma D.cis Sigridis Albert(ae)]

INECVLA SLVITER
Amstelvenensis
(Amstelveen)

[Amstelvēnum est quasi
suburbium meridionale
urbis Amstelodāmī]